

got sol uns helfe erzeigen
uf den der manegen veigen
der sêle hât gepfant.

Diz kurze leben verswindet,

5 der tût uns sündic vindet:
swer sich ze gote gesindet,
der mac der helle engân.
bî swære ist gnâde funden,
nû heilent Kristes wunden,

10 sîn lant wirt schiere enbunden:
dêst sicher sunder wân.
kûngîn ob allen frouwen,
lâ wernde helfe schouwen.
dîn kint wart dort verhouwen,

15 sîn menscheit sich ergap.
sîn geist müez uns gefristen,
daz wir die diet verlisten.
der touf si seit unkristen:
wan fürhtent si den stap

20 der ouch die juden villet?
ir schrîfen lûte erhillet.
manc lop dem kriuze erschillet:
erlœsen wir daz grap!

Diu menscheit muoz verderben,

25 suln wir den lôn erwerben.
got wolde dur uns sterben,
sîn drô ist uf gespart.
sîn kriuze vil gehêret
hât maneges teil gemêret.

30 swer sich von zwîvel kêret,
der hât den geist bewart.
sündic lîp vergezzen,
dir sint diu jâr gemezzen:
der tût hât uns besezzen

35 die veigen âne wer.
nû hellent hin geliche,
daz wir daz himelriche
erwerben sicherliche
bî dulteclicher zer.

40 got wil mit helde hands